

KA TSHITISHIMAKANIT ATSHEN

Etuat Rich

Netutikuet ne napeu, anite mishikamanu shakaikannu nenu uatshit. Nasht nete tshikasseuiashinu, ekute anite uatshit, nete matshiteu uitshu. Eukuannu pet itutet umenu, shakapushtenu pet itutet, shakapushteshinu. Ek^u apu tat tepishkanit.

Tshek metshishimuniti ne kukuminash utema, mitshishimunua anite utema. « Eukuanitshe put », itenimeu nenua unatshima. Ek^u pet pimutet ne napeu, miam taushkuetshe nenua Atshena ekue nipaikut. Ekue kushtinaht anitshenat utemuaua tshetshi mitshishimuniti. Uiashtet ma, nete ut uashtenu, ashtamashk^u ekute uet uashtenit nenu katshi nipaikanniti unatshima. Katshi nipaikanniti nenua unatshima, uet shateiashkutet. Tshimut pushiht ek^u, kushtineuat tshetshi mitshishimuniti utemuaua. Tshekat nenu utitashtenimakut nenu ishkutenu eshpish mishta-tshikanakuannit. Tshekat nenu utitashtenimakut, pimishkaht at.

Minuat uiapannit (mishikamanu nenu shakaikannu) iapit pimishkauat. Nete pet kutueniti nenua Atshena, nashakut nenu pet. Minuat ekue tipishkat, eshk^u pimishkauat iapit.

— Uetitamak^u nika ! itiku. Ek^u tshe utitamak^u e kassekaut.

Mishta-ishpishekanu e kassekaunit.

— Tshe utitamak^u, nika, tshe tshissekat, itiku. Tanite tshe tshi pimuteiak^u ek^u ?

— Eshe, iteu.

— Uetitamak^u, nika ! itiku.

— Aka, akunik^u nitanish ! iteu (mak nenua ussimisha tashinua). Akunik^u !
iteu.

Ekue akunakueht, muk^u ne pimishkashu kukuminashish.
Ekue utitaihk, petamuat nenu at utitaihk, e kassekaunit nenu. Shiatshuatshipaniht,
nete ma enat etaht, shash nete utat takuannu nenu kessekaunit.

— Aka nitanish, itiku, shatupi !

Ekue mannaminiti nenu ka akunakueniti. Nenu mishta-ishpanishekanu, utat
nete shash takuannu. Uemaimuat nenu shash ekue piutahk minuat, ekue utitauaht
nete innua etaniti. Ek^u nakataueuat nana utatshenimuaua nenu e kassekaunit.
Ek^u eshuapamakanit ne Atshen. Ek^u apu tat, tanite nakataueuat nana.

Aishkat ma anite eshpish tananut, tshek ekue pipuk.

Shash.